

Semua IPT sedia aktifkan kelas dalam talian susulan penangguhan pendaftaran pelajar baharu

Muka 6

Penularan COVID-19

Universiti sedia mula kelas dalam talian

Pengurusan tiada masalah aktif semula sistem pernah dilaksana ketika PKP

Oleh Suzalina Halid
suzalina@bh.com.my

Kuala Lumpur: Semua universiti bersedia melaksanakan kelas dalam talian pada semester baharu bulan ini susulan penangguhan pendaftaran secara fizikal bagi pelajar baharu dan lama institusi pengajian tinggi (IPT) di negara ini.

Pengerusi Jawatankuasa Naib Canselor dan Rektor Universiti Awam, Prof Datuk Dr Mohammad

Shatar Sabran, berkata pihak universiti tiada masalah mengaktifkan semula sistem kelas dalam talian yang pernah dilaksanakan ketika Perintah Kawalan Pergerakan (PKP), Mac lalu.

Katanya, penuntut yang sudah tiba di IPT masing-masing juga boleh tinggal di kolej kediaman di universiti bagi meneruskan kelas pembelajaran dalam talian.

"Kita menjangkakan tiada masalah meneruskan semula kelas dalam talian kerana sistem ini memang sudah ada di setiap universiti dan ia digunakan ketika PKP lalu.

"Dalam keadaan pandemik yang tidak boleh dijangka, kita sentiasa bersedia dengan senario semasa dan melaksanakan keputusan terbaik demi keselamatan penuntut melalui pelaksanaan kelas secara dalam talian ini.



Mohammad Shatar Sabran

"Namun bagi penuntut yang memilih untuk terus tinggal di kolej kediaman di universiti juga tiada masalah mengenainya. Kita tidak meminta mereka balik," katanya ketika dihubungi BH, di sini, semalam.

Pada masa sama, Mohammad Shatar yang juga Naib Canselor Universiti Pendidikan Sultan Idris (UPSI), berkata majoriti pe-

nuntut di UPSI sendiri masih berada di universiti untuk mengikuti kelas dalam talian.

Sementara itu, beliau berkata, keputusan dibuat pihak universiti dalam setiap perkara bergantung kepada senario semasa seperti diputuskan Majlis Keselamatan Negara (MKN).

Beliau berkata, contohnya ketika tempoh perintah larangan sebelum ini, pihak universiti menyediakan bas menghantar penuntut pulang kerana pengangkutan awam tidak dibenarkan beroperasi ketika itu.

"Justeru, bagi perkembangan kali ini, universiti tidak menyediakan bas kerana kita bukan berada pada fasa perintah larangan dan masyarakat masih bebas bergerak menggunakan bas atau keretapi, malah mereka juga masih boleh duduk di universiti.

"Namun, bagi penuntut menga-

lami masalah berkaitan aspek kebijakan, boleh merujuk kepada Hal Ehwal Pelajar untuk mendapatkan bantuan," katanya.

Timbalan Naib Canselor (Akademik dan Antarabangsa) Universiti Putra Malaysia (UPM), Prof Dr M Iqbal Saripan, pula berkata dalam memastikan pembelajaran dalam talian terus berkesan, pihak universiti memberikan semua penuntut termasuk penuntut baharu simkad 40 gigabait (GB) dengan kerjasama jenama YES.

"Selepas pelaksanaan kelas dalam talian sejak PKP sebelum ini, tenaga pengajar sudah diberi latihan mengendalikannya dengan lebih baik," katanya.

Katanya, penuntut kategori B40 yang memilih kekal di kolej kediaman khususnya dari Sabah pula, pihak universiti memberikan bantuan termasuk makanan dan kemudahan internet.